

POVODOM GODIŠNJE SKUPŠTINE PODRUŽNICE GEODETSKIH INŽENJERA I GEOMETARA TUZLA

Šestog juna ove godine u Živinicama je održana Skupština podružnice geodetskih inženjera i geometara Tuzla koja okuplja ove stručnjake sa osam opština sa regiona sjeveroistočne Bosne: Banovići, Kalesija, Kladanj, Lopare, Lukavac, Srebrenik, Tuzla i Živinice. Skupštini je prisustvovalo oko 50 članova od ukupno 80 geodetskih stručnjaka sa ovog područja. U ime domaćina Skupštine opštine Živinice, skup je pozdravio i prisustvovao radu Skupštine predsjednik Izvršnog odbora Sead Šahinpašić.

Pored redovnih izbora rukovodstva podružnice, Skupština je imala za cilj pokretanje članstva na aktivniji rad u narednom periodu, čijom se angažovanošću i zajedničkom pristupu rješavanja odredjenih problema može bitno unaprijediti efikasnost rada geodetskih organa i službi u regionu i doprinijeti daljoj afirmaciji struke. U tom pravcu istaknuta je potreba brže transformacije i prilagođavanja organa i službi savremenim kretanjima koja nameću zahtjeve za raznovrsnijim, kvalitetnijim i efikasnijim geodetskim opsluživanjem. U traženju rješenja i pravaca djelovanja na ostvarenju ovog zadatka posebno je ukazano na mogućnosti koje pruža međusobna saradnja u smislu kadrovske jačanja, primjene savremenih metoda i tehničkih dostignuća u ovoj oblasti, pa je neophodno stvarati uslove za čvršće povezivanje geodetskih službi i organa u regionu i njihove saradnje sa naučnim institucijama u prvom redu sa odgovarajućim zavodom Rudarskog fakulteta u Tuzli.

Radi uspostavljanja neposrednijih kontakata geodetskih organa i službi sa ovog područja kao i šireg i potpunijeg upoznavanja društveno-političkih organizacija i zainteresovanih organizacija udruženog rada o problemima ovih službi i struke kao i aktivnostima podružnice na Skupštini je zaključeno da se u buduće sastanci podružnice organizuju svaki put u drugoj opštini. Slijedeći sastanak koji se predviđa već u septembru mjesecu biće održan u Kladnju. Dotle je neophodno, kako je i zaključeno na Skupštini, sačiniti Akcioni program rada ove podružnice za naredne 2 godine.

Iz priprema broja učesnika i samog toka rada Skupštine podružnice steklo se uvjerenje o spremnosti članstva na puno uključivanje u budući rad podružnice koji će biti sadržajni i obuhvatniji, rad koji bi doprinio potpunijoj afirmaciji našeg rada i struke u skladu s našim doprinosom kao i svakog člana na svom radnom mjestu u samoupravnom društveno-ekonomskom razvoju naše socijalističke zajednice.

Na skupštini je izabrano novo izvršno rukovodstvo - Predsjedništvo podružnice od 11 članova. Za predsjednika podružnice izabran je Ing. Ranko Zuber, a za sekretara Bešlić Izet, geod. ing.

Nakon završetka rada Skupštine održano je drugarsko veče koje je proteklo u srdačnoj i drugarskoj atmosferi.

Begić Mustafa

I N F O R M A C I J A

PETI KONGRES GEODETSKIH INŽENJERA I GEOMETARA JUGOSLAVIJE

Uskoro će se navršiti punih sedam godina kako je u Sarajevu 1968.g. održan IV kongres geodetskih inženjera i geometara Jugoslavije. U tom periodu nastale su velike izmjene u pogledu usmjerenosti, sadržaja i tehnike rada na polju geodezije. Nastale su, također, krupne društvene promjene kao i organizacione promjene u okviru struke i službe. U takvim uslovima potrebno je na jugoslovenskom nivou dati ocjenu stanja, sagledati probleme i ukazati na orijentaciju o bitnim pitanjima od opšteg interesa za geodetsku struku i geodetske stručnjake. Ujedno je potrebno utvrditi smjernice za dalji razvoj i program aktivnosti Saveza geodetskih inženjera i geometara Jugoslavije.

Na osnovu takve procjene i statutarnih ovlašćenja Predsjedništvo Saveza geodetskih inženjera i geometara Jugoslavije donijelo je odluku da se održi Peti kongres geodetskih inženjera i geometara Jugoslavije.

Formiran je Centralni odbor za pripremu i organizaciju Kongresa i usvojene odluke sa kojima želimo da upoznamo našu stručnu javnost.

Sa ciljevima i zadacima Kongresa upoznati su predstavnici Savezne konferencije SSRNJ i drugi društveno-politički forumi. Sa njihove strane Kongresu se pridaje veliki značaj i izražava spremnost da se pomogne u njegovoj organizaciji i pripremi. U tom smislu biće formiran i Počasni odbor Kongresa. Peti Kongres geodetskih inženjera i geometara Jugoslavije održaće se u Beogradu 18-20. decembra 1975. godine u Velikoj sali Doma Sindikata Jugoslavije.

Kongres treba da razmatra pitanja društvenog, organizacionog, tehničkog i naučnog karaktera od opšteg značaja za